

que Herodes Magnus instauravit, & in honorem Cæsaris *Cæsaream* appellavit, & in ea Petrus baptizavit Cornelium centurionem Act. x. A Cæsarea novem leucis contra Austrum est *munitio Arsur*, quondam *Antipatris* ab Antipatride Herodis Magni dicta. Hæc aliquando fuit Fratrum de hospitali Sancti Johannis. Ab Arsur quatuor sunt leucæ contra Orientem ad *Manathat*, nunc *Kato* dicta, & sub monte Ephraim sita, non longè à monte Saron. In hac Saraceni posuerunt præsidium militum contra castrum peregrinorum. A Kato quatuor leucis contra Austrum est *mons Saron* & oppidum *Sarona*, de quo fit mentio in Actibus Apostolorum, Act. ix. 35. De Arsur octo sunt leucæ usque ad *Joppen*, & hinc quatuor numerantur usque in *Geth*, quæ olim una fuit de principalioribus civitatibus Philistinorum: sed nunc parvum est casale, vocaturque *Ybilim*, in colle situm. A Geth duæ sunt leucæ contra Austrum ad *Bethsames Juda*. Hinc si ad Orientem procedas, post sex leucas occurrit *mons Modin*, de quo oriundi fuerunt Machabæi, & ostenditur illic sepulchrum eorum. A Bethsames contra Occidentem, ferè per quatuor leucas, haud longè à Mari, est *Accaron*, etiam una de principalioribus civitatibus Philistinorum. Verùm hodiè exiguum est casale, antiquo retento vocabulo. Ab Accaron quatuor sunt leucæ versus Austrum ad *Azotum*, quæ etiam una fuit ex prioribus Philistinorum civitatibus, una leuca à Mari distans, sed hodiè parva est villa. A Joppe duæ sunt leucæ ad *Lyddam* seu *Diospolim*. Hinc quatuor leucæ contra Orientem ferè, paululum ad Aquilonem declinando, est *Lobna*, non longè à *Labis*, quàm cepit Josua, Jos. x. 32. & quam obsedit Sennacherib, 2 Chron. xxxii. 9. Inde per tres leucas, in via, quæ ducit ad Gabaon, est *Azeca* oppidum, & *Maceda*, ubi quinque reges se absconderant in spelunca, de quo in Josua, Jos. x. 16. Hinc si progrediaris tribus leucis contra Orientem, non longè à *Nobe*, est *Sochoth Juda*, juxta vallem Terebynthi, ubi puer David in funda & lapide interfecit Goliath Gethæum, 1 Sam. xvii. 49, 50. A *Nobe*, quæ hodiè *Bethnopolis* vocatur, sunt tres leucæ usque in *Emaus*, quæ hodiè *Nicopolis* appellatur. Ab Emaus, spatio unius leucæ & dimidiæ, ascenditur per *vallem Raphaim*, à latere *domus Zachariae*, quæ relinquitur ad dextram euntibus in Jerusalem. Ab hac Zachariæ domo numerantur tres leucæ & dimidia dextrorsum ad castrum munitissimum, *Bethsura* nomine, situm in latere montis contra Bezeck & Bethlehem, quod ædificatum fuit tempore Machabæorum, & paulò post fraudulenter captum ab Antiocho adolescente. Distat autem ferè per unam leucam à Jerusalem. Ab Azoto quatuor leucis contra Austrum est *Ascalon*, quarta Philistinorum civitas, sita in littore Maris, & habens formam semicircularem, unicum ferè robur & propugnaculum Saracenorum in terra illa. Ab Ascalone duabus leucis contra Austrum est *Gaza*, in littore quoque Maris sita, quæ nunc communiter *Gazara* appellatur, & transit per eam via in Ægyptum. A Gaza quatuor numerantur leucæ usque ad *Bersabee*, quæ nunc *Giblin* dicitur, & est terminus Judææ atque Terræ Promissionis contra Austrum. In hac manserunt multo tempore Abraham & Isaac, ut patet in Genesi, Gen. xxi. 19. Gen. xxvi. 23, 25. Distat ab Hebron sicut & Gaza paulò amplius una diæta. Ultra hanc extremitatem Terræ Sanctæ est *desertum* illud magnum, quod ad Ægyptum usque ferè extenditur, in quo oberraverunt filii Israël quadraginta annis, Num. xxxii. 13. Itaque *Longitudo* Terræ Sanctæ ab Aquilone incipit à monte Libano juxta Cæsaream Philippi, extenditurque contra Austrum usque in Bersabee Juda, quæ est contra desertum, complectens plus minusve Sexaginta septem leucas. *Latitudinem* verò ejus non adeò exactè observavi. Porro memorata *longitudo decem* tantum complectitur *Tribus*. *Tribus Juda* superiorem obtinuit regionem, quæ in longitudine quidem extenditur ab Ægypto usque in Jerusalem, diciturque intervallum illud occupare septem diætas. In latitudine verò incipit à lacu Asphalti, hoc est, à mari Mortuo, & definit usque ad Mare Magnum in Occidente. *Tribui Simeonis* obvenit pars in ipsa tribu Judæ, nempe quæ est juxta Ægyptum circa montana Arabiæ. *Benjaminitæ* sortiti sunt possessionem suam à Jordane usque ad Mare Magnum in longitudine, latitudo verò ejus est ab Jerusalem usque in Bethel, quatuor ferè complectens leucas. *Tribus Ephraim* sortem suam accepit à Jordane fluvio